

Resolución reitoral, do 19 de decembro de 2023, pola que se establece o uso obrigatorio da conta de correo electrónico corporativa para o Programa para a atención á diversidade do alumnado con necesidades específicas de apoio educativo (PIUNE)

O Programa para a atención á diversidade do alumnado con necesidades específicas de apoio educativo (PIUNE) da Universidade de Vigo nace co obxectivo de ofrecer un apoio educativo adecuado ao estudiantado que teña necesidades específicas no seu proceso de aprendizaxe. No marco da nosa responsabilidade institucional, é fundamental garantir a protección dos datos persoais do alumnado e manter un fluxo de comunicación eficaz e seguro entre todos os axentes implicados no programa. É por iso que en cumprimento das súas responsabilidades e en virtude das competencias que lle confire a normativa vixente, e considerando a importancia de garantir a protección e a eficacia dos datos na xestión do programa PIUNE, así como pola necesidade de centralizar a comunicación relacionada con este programa, esta reitoría

RESOLVE:

Primeiro. Establecer o uso obrigatorio da conta de correo electrónico corporativa.

A partir da data de entrada en vigor desta resolución, establécese como requisito obrigatorio que todas as persoas participantes no programa PIUNE, incluídos, entre outros, o estudiantado, o profesorado responsable do programa nos seus centros ou facultades, as persoas voluntarias, as bolsas e bolsiros de apoio ao estudiantado, titores e titoras PIUNE, e outras figuras relacionadas, utilizarán exclusivamente as súas contas de correo electrónico corporativas na Universidade de Vigo para calquera comunicación relacionada co programa PIUNE.

Segundo. A non atención a mensaxes de correo electrónico non corporativa.

Comunícase expresamente que, a partir da data de entrada en vigor desta resolución, a Unidade de Atención á Diversidade (Unaten) e a comisión técnica de apoio á Unaten (Coaten) non responderán ningunha mensaxe de correo electrónico que trate temas relacionados co programa PIUNE e que proceda de contas de correo electrónico distintas ás corporativas da Universidade de Vigo. Isto inclúe, pero non se limita, ás mensaxes enviadas desde contas de correo electrónico persoais ou doutras institucións.

Terceiro. Divulgación e aplicación.

A presente resolución terá unha ampla difusión a través das canles de comunicación institucional da Universidade de Vigo e aplicaráse dende a súa entrada en vigor.

Cuarta. Vixencia.

Esta resolución entrará en vigor a partir do día seguinte da súa publicación oficial, no taboleiro da Uvigo.

Contra a presente resolución, que pon fin á vía administrativa, poderase interpoñer un recurso ante a xurisdición contencioso-administrativa no prazo de dous meses contados desde o día seguinte á súa publicación, de conformidade co disposto na Lei 29/1998, do 13 de xullo, reguladora da xurisdición contencioso-administrativa.



As persoas interesadas poderán optar por interpoñer contra esta resolución un recurso de reposición, no prazo dun mes contado a partir do día seguinte á publicación da presente resolución, ante o mesmo órgano que a ditou. Neste caso non se poderá interpoñer un recurso contencioso-administrativo ata que sexa resolto expresamente ou se producise a desestimación presunta do recurso de reposición interposto, segundo o previsto no artigo 123.2 da Lei 39/2015, do 1 de outubro, do procedemento administrativo común das administracións públicas.

[Sinatura do reitor]
Manuel J. Reigosa Roger
Reitor da Universidade de Vigo

